

Kolumna visokog predstavnika Valentina Inzka: Neka političari rade za vas

Najblaže što možemo reći za ovu godinu jeste da je donijela brojne izazove. Životi svih nas okrenuti su naopačke, morali smo promijeniti naše brojne svakodnevne navike. Neke stvari koje smo uzimali zdravo za gotovo nestale su, i u tren oka morali smo se reorganizirati i prilagoditi novim okolnostima i ovom, ponekad zastrašujućem svijetu elektronske komunikacije. Činjenica da je u tako vanrednim okolnostima, izložen ozbiljnim zdravstvenim rizicima, vaš mali tim uspio održati novine u životu je veliko postignuće. Kapa dolje!

Posljednjih nekoliko mjeseci su nas podsjetili koliko je važna uloga medija, posebno u vrijeme krize. Vaša uloga je ključna kada je riječ o pružanju točnih i pouzdanih informacija javnosti, istodobno poštujući najviše profesionalne i etičke standarde. To je ogromna odgovornost, a vi je sa sobom nosite svaki dan, 24 sata dnevno. Vaš posao je zahtjevan i težak čak i u najboljim okolnostima, a sada, u vrijeme pandemije, zahtjevniji je nego ikad.

Nije nikakva novost kada kažem da se pred nama nalazi još izazova. Uskoro počinje predizborna kampanja. Neki kažu da su političari u BiH stalno u kampanji, što nije daleko od istine. Javni diskurs pun je velikih tema, vjekovna pitanja izranjaju gotovo svaki mjesec, sa svih strana čuju se veliki planovi, velike riječi lete na sve strane kao nenavodeni projektili, ispaljeni u zrak bez ikakvog razmišljanja o tome koga bi mogle povrijediti ili što bi mogle biti posljedice. Istodobno, stvarni život ide dalje i prati druga pravila. A to znači život u kome morate kupovati udžbenike za djecu, patike, zimske jakne, život u kome morate odlučiti hoćete li oca odvesti onkologu privatno i to skupo platiti ili ćete riskirati i čekati pregled zakazan za svibanj 2021., kada može biti već prekasno.

U prethodnim izbornim ciklusima vidjeli smo da politička elita ima malo ili nimalo poštovanja za svoje birače. Da imaju poštovanja, oni ne bi zasnivali svoje kampanje na retorici podjele, na uvredama upućenim pripadnicima drugih naroda ili vjerskih zajednica, niti na teorijama zavjere. Kad bi samo sva ta energija koja je usmjerena na stvaranje svih vrsta neprijatelja, koji vrebaju iza svakog kuta, bila usmjerena u drugom pravcu, stvari u ovoj zemlji bi se mijenjale nevjerovatnom brzinom. Ja sam to vidio svojim očima i vjerujem da se to može dogoditi i sada. Ova kampanja može biti drukčija. Ona se može baviti rješavanjem praktičnih izazova s kojima se ljudi svakodnevno suočavaju. Pozivam sve kandidate da se fokusiraju na svakodnevna pitanja iz stvarnog života umjesto da se drže postojećeg obrasca podsticanja straha retorikom podjele.

Nadam se da će poslije izbora biti vremena i političke volje da se provede dogovor u vezi s izborima u Mostaru, u vezi s Izbornim zakonom, da se riješi predmet Sejdić-Finci i druge vezane presude, kao i sve odluke Ustavnog suda, uključujući presudu o ravnopravnosti svih konstitutivnih naroda i Ostalih na cijeloj teritoriji Bosne i Hercegovine.

Upoznao sam mnogo ljudi iz BiH širom Europe. Oni su pristojni, marljivi ljudi, građani koji poštuju zakon, poput većine ostalih Europljana. I svima njima zajedničke su dvije stvari: ljubav za domovinu i žaljenje što su morali otići zbog stvari koje se mogu riješiti, kada bi samo oni koji su na vlasti, s mandatima koji su dobili od naroda, htjeli napraviti drukčiju listu prioriteta. Kad god razgovaram s onima koji su otišli ili se spremaju otići, na vrhu liste razloga za odlazak svaki put se nalazi vladavina prava, odnosno njeno nepostojanje.

Ja sam sasvim čvrsto uvjeren da se *status quo* može mijenjati nabolje. A ta promjena obično počinje iz lokalnih zajednica. Ove godine imamo lokalne izbore. Većinu kandidata na listama vjerovatno poznajete. Siguran sam da među njima ima običnih građana poput vas, koji su se kandidirali iz želje da se stvari poboljšaju, da se grade škole, popravljaju putevi i općenito poboljšavaju životni uvjeti za sve. Birajte njih. Zanimarite svu buku, birajte one koji su spremni zauzeti se za vaše probleme. I pobrinite se da ispune obećanja koja daju.